

Invitacion pa presentacion di buki “Cicatriz di Mirada” di autor Arubano Angelle Stamper

ORANJESTAD – E aña aki poeta Angelle Stamper a debuta cu su buki di poesia “Cicatriz di Mirada” for di Hulanda. Actualmente Angelle ta na Aruba pa presentacion di su buki, cual lo tuma luga dia 3 di januari 2017 na Renaissance Marketplace cuminsando pa 7or di anochi. Durante e anochi Angelle lo presenta su obra a traves di declamacion di varios poema.

Cicatriz di Mirada ta un album di poesia conteniendo poema na Papiamentu, Ingles, & Hulandes acompaña pa potretnan saca na Aruba saca pa Angelle su mes persona. Na varios ocasion Angelle a declama poesia na diferente evento cultural, exposicion di arte y actividad formal tanto na Aruba y den exterior. Angelle a participa diferente biaha na e competencia literario “Arte di Palabra” na Aruba y na Corsou.

Na diferente ocasion a bay cu premio di prome y segundo luga pa su poemanan “Garnachi di Speransa” y “Bo no mag di bay”. Na 2011 Angelle tabata un di e 25 hobennan cu haya reconocimiento en conexion cu celebracion di 25 aña di Status Aparte, pa medio di exposicion Aruba Dushi Tera “Chikito y simpel bo por ta pero si respeta”.

E mesun aña Angelle a presenta su poema “Freedom within” na desvelo di estatua di Anne Frank den Wilhelmina Park.



Pueblo di Aruba ta keda cariñosamente invita pa bin presencia e presentacion di “Cicatriz di Mirada”. Despues di e presentacion lo tin un sesion di firma. Entrada pa e evento ta gratis. Pa mas informacion por tuma contacto via 6624003 of por email na cicatrizdimirada@gmail.com.